

亦如罗威，有花，然至老始一开，开即萎矣。每栽此，八十年始一花也。又一玻璃厅，有池植荷花。其一种荷花叶大可逾丈，而背面出格文，深可数分，茎有刺二分许，叶常浮水面，其力能胜人；花如莲，而瓣较长而削，厚至七八层。又一琉璃厅，聚各国草木本可食及充药品者。金鸡刺树名新戈刺，其皮有霜，洋人名之乖宁也，叶圆大。加非树叶光而尖。象皮树有数种，叶或五出，或大如枇杷叶，肥厚光润。有一树高丈许，抽条着叶，圆细而厚，周环条端，约五寸许乃着花，三四寸许又复着叶，叶花相间，其花蕊大如豆，每蕊抽红丝数十百，茎上着小黄粟，无瓣，周环如垂缨，亦有奇致。其馀花木多可观者，惜不能一一得其主名也。每日有精习花木之学者来此讲授，别为一屋，药品、食品罗列满架，玻璃瓶贮诸果品，亦逾数百。其学师名奔得里。其精习金石之学者名敦兰得，即地理茶会所见，皆在金斯戈里叱分掌医务。金斯戈里叱者，英国医学馆也。奔得里日一至此，男妇就学者常数十百人。其间菩提叶可织丝若棉，设法令其白，又令其细，织布若番布，云皆以人工为之。欲制造一机器，尚未得其法也。苏尔比邀至其家本园中另置屋数间，亦极精雅，出示花草谱十五帙，云克尔谛斯原本，凡数十年集花草种类数千万种；虎哥继之，又数千万种，无有穷已也。其言花不分草木，而统分明、暗二种，暗花或含入叶内，或连茎而叶外护，非细审不可见，其种类至不可穷纪。此则中国人所未经考究及此者也。李丹崖及日意格来谈。是日礼拜。园中有二石，为螺形而稍扁，石纹亦类螺之旋，云掘土得之，数万年前海螺沦入地中而化为石，其大如两檐臼也。又有六方石，大约尺六七寸，高七八寸，累五六石，略似柱，云出苏格兰北山中，其石相联合如花瓣，常累至数层。又有一石如蜡，高三尺许，磊砢离奇，云出波斯兰海口。皆有奇致。

初九日。发总署及合肥伯相五次信，兼寄周荇农、金眉生、

周瀛士、唐景星、郑陶斋，及家信第五号，及志城及蟠西及易淑子各信。

初十日。接黄泳清十八号信件，知正月四日发递一信，已于二月十八日递到，计行四十五日。此信由英公司机华轮船自上海二月廿二日开行，计行四十七日，而吾家十一月杪杨瑞堂抵家月馀后乃发一信，自是绝无书报，不解何故。提督贺拉函约茶会，云有利音者悟出一法，可以用太阳光传递书信，并约至其家试之。此邦术事愈出愈奇，而一以学问思力得之，人心固无不有也。

十一日。寄唐景星信，交得拿带去，以商办铸钱厂所用机器。得拿设德尔明丰得里机厂，专制铸钱机器。德尔明，江名也，机厂在其旁。诣哈尔该尔公、威威玛、敏斯达。威妥玛昨有信与约，竟置不顾，亦一奇也。德尔比格非斯再邀茶会。是夕，赴伯鲁恩邀入善堂跳舞会，以贱名为之首，盖威勒斯里濒行时所约也。坐晤提督英格尔菲尔，及阿尔勒里西、何麦斯、特得里诸内里。特得里夫人，英国最为有名者。

十二日。水晶宫总办贝尔叱函约往游，洋语谓之克立斯登巴雷司。克立斯敦，译言水晶也。适莼斋、在初、夔九、和伯、彦嘉、听帆、湘甫及马格里公邀李丹崖、日意格一饭，并邀至水晶宫，予亦因入一分。由维多里亚地方乘坐轮车，过代模斯江桥至克拉奔，向东行至兰海，过两小山，车路适出水晶宫后。贝尔叱迎于车次。入门皆玻璃为屋，宏敞巨丽，张架为市，环列百馀，其前横列甬道，极望不可及。中列乐器堂，可容数万人列坐。其右又一小乐器堂相对，亦容数百人，别为一院。左为戏馆，就坐小憩。又绕出其左，为水晶宫正院。巨池中设一塔亭，高可数丈，吸水出其顶，旁为海神环立，所乘若龙，两眼吸水上喷，高约数尺，张口吐水，日夜潏潏，大树环列数十株，水晶宫最胜处也。曲折相接为巨屋，